

Nowodhow an Seythen

17/02/09

Kyns Nadelik, y feu Ayrborth Kernow deges wosa an konsel dhe fyllel hag i ow treusworra an ayrborth dhyworth an RAF dh'y wul a-vel ayrborth sivil. Deges veu rag teyr seythen ha res o dhe vyajysi mos yn kytrinyow bys yn Aberplymm ha Karesk. Awos henna, I a wovynnas may fo possybyl degemeres astiveryans.

An seythen ma y teuth an gorthyb. Na vydh astiveryans.

Serrys yw tus kepar hag esel senedh Westminster rag Truru, Matthew Taylor. Yma ev orth aga hastiga war an desten.

**

Yma Gonisyow Sosiel an Konsel ow pragya kas lahyl war Ganel Peswar mar na wrons kildenna an dowlen 'Boys and Girls Alone' ...po Mebyon ha Myrhes Tre a'ga Honan.

An dowlen re worras flehes ynter dewdhek ha peswardhek bloodh yn chi... ha'ga gasa dhe vewa y'ga fordh aga honan.

Selys veu yn Kernow... ha Konsel Kernow a grys bos erbynn gwiryow mabden.

Kanel Peswar a lever bos skoodhyans professyonal a-dryv dhe'n kameras...hag yth esa gallos dhe'n kerens kemeres dhe-ves aga flehes.

**

Pennrewler servadow an tanlu, Terry Standing, a lever na vydh treghyansow gwrys dhe'n gonis yn Kernow. Hemm yw wosa kaskyrgh hir rag gwitha kudhans a-dro dhe'n klok orth Kambron hag Aberfal. Dres henna, ev a lever na vydh tanwas vyth trehys dhyworth gorsavow tan erel a-dro dhe Gernow. Y teu an tians ma kyns bojet Konsel Kernow an seythen ma. An govyn yw, ytho, a ble y teu an mona?

**

Popti Rowes re wrug kevambos gans sodhva Maga.

Y fydh lyver lavarow Kernewek danvenys a-der-dro dhe werthjiow may hallo oberysi dyski tamm a'n taves. Tybyans asran marhasya yw rag an Gool Peran ma. An kowethas pasti ma a vynn dynerhi moy a dus yn Kernewek... byttegyns my eth a-ji neb unn gwerthji Rowes hag assaya lavar warnedha - ha ny wodhya denvyth y'n gwerthji na travyth a'n dowlen - martesen y kodh dhymm gortos termyn hirra kyns my dhe'ga apposya!

Oll an gwella bys y'n nessa seythen.